

I O S E L E T I .

102113201

I OSELETI
CAPRICIO DITIRAMBICO
IN DIALETTO VENEZIANO.

. excludit sanos Helicone Poetas
Democritus.

Horat. Poet.



IN VENEZIA
MDCCCV.

Nella Stamperia GRAZIOSI a S. Apollinare
Con *Pubblica Approvazione.*

A

XIX

98


BIBL. INTERN.
« LA VIGNA »
VICENZA



7
L' A U T O R

A I S O A M I C I .

Oibò: Vin Friularo solo, Polenta sola no pol esser el gusto de tuti i stomeghi; acompagnadi, che i sia da un poco de companadego i riesce più gustosi, e più adatai al genio dela maggior parte. Eco dunque che ve ne preparo un piato de Oseleti, che i xè adatatissimi per la Polenta; e se i fosse un poco salai, anca per el Vin. Procurarò donca de meterghe quà, e là dei graneli de sal. Me despiasarave po, che sti graneli o i fosse massa grossi, e i facesse fastidio, o pur massa picoli, e no i contasse gnente: Ma a questo penso de rimediar- ghe co una bona dosa de compitimento, che spero, che me darè, perchè ve so dir, che dele volte la roba par o salada, o desavia secondo, che gà la boca quei che la cerca.



I O S E L E T I

CAPRICIO DITIRAMBICO.

Benedeto sia l'Autunno
 Benedeta sta stagion
 No ghè tempò più lodabile,
 Più pregiabile, più bon.
 Ghe xè molti, son sicuro,
 Che dirave: ave rason;
 Ma per cossa lo diraveli?
 Per un gusto macaron.
 I dirave parchè nasce
 Quel prezioso
 Tanto odoroso
 De quel netare divin,
 Quel'ambrosia, idest el vin.
 Mi?l me piase no lo nego;
 Ma lo bevo solamente,

Per parar
 Zo quel poco de magnar:
 Ma per altro a cossa far?
 Xè lodabile l'Otuno;
 Ma savèu mo el gran perchè? ...
 Perchè nasce la polenta?
 Cosa varla cussi sola?
 Eh voleu saver perchè?
 Perchè tempo no ghe xè,
 Che ne daga in più abbondanza
 La piananza
 De quei cari benedeti
 Cussi boni de Oseleti.
 Ne ghè meglio, v'assicuro,
 Velo zuro,
 No ghè meglio in tutto el mondo,
 A Berlin, Roma, Parigi,
 Sul Danubio, sul Tamigi,
 Sul mar negro, sul ma gnente;
 Mi son stà da tanta zente
 Da magnoni,
 Signoroni:

O magnà dei gran boconi,
 O sentio de tante sorte,
 E de torte, e de pastizzi,
 Lievri, Cervi, e Porci rici;
 Dei Dentali, Astesi, Toni,
 Dei Storioni....
 Dei minchioni....

No ghe xè gnanca confronto,
 No ghe dago, se i me prega,
 Se i me prega in zenochion
 Gnanca un bocon....

Cossa digo? No dasseno
 No ghe dago a dirlo schieto
 Gnanca un beco d'Oseleto.
 No, ve digo, perchè 'l beco
 No lo buto minga via;
 Guai par dia;
 L'è un bocon
 Tanto bon....

Mi voria, che me vedessi,
 Quando magno i me Oseleti,
 Come meto i so becheti

Tuti quanti separaï
In tun piato picinin,
Che me tegno da vicin.
E po dopo, che ho finio
De magnarme sti Oseleti,
O che 'l piato gò impenio,
Me i destrigo tuti neti;
E che gusto, che i me da;
I me fa
Richiamar tuti a memoria;
Anzi digo, sul palà
I me chiama tuti i gusti
Dei Oseleti, ch'ho magnà.
Oh! che gusto, magior d'ogni gusto
Se podesse goderlo in eterno,
Oh! che gran felicità.
E pur tanti ghe xè stà,
Che lo gà fin disprezzà.
E ti filosofo
Ti xè pitagora,
E dei Demagora
Ti trovarà,

Che le to legi

Le to scempiagini

Adularà?

Mi ve digo, che par sbrio

El più scioco no ghè stà.

Basta dir, che l'ha proibio,

Come el tipo d'ogni mal,

A tuti i omeni,

Ai vechi, ai zoveni,

Fin ale femene,

Fin ale gravide

Magnar carne d'animal....

Mi per far al'incontrario

De quel testa de cocal

Voi magnarghen fin, che posso,

E co più no podarò

Ala romana me tirarò

Duro duro

Arente un muro;

E co un deo zo par la gola

Darò un ordine pressante;

„ Che qualunque viandante,

„ Che si trovi in quel distretto,
 „ Sia nel ventre, sia nel petto,
 „ Alla vista di quel dito
 „ All' Esofago salito,
 „ Ex abrupto ceda il loco
 „ Ai piatelli del mio cuoco....

Siora Aneta benedeta

La m'ha tanto consolà,
 Co la ho vista a vegnir quà,
 Che no so più cossa dir:
 Ma podevela vegnir
 Megio a tempo de cussì?
 Proprio se vede che la me vol ben
 Se la se degna de disnar co mi.

Quà la sa, che xè bandii
 El zambon, el salpicon,
 L'alisson, el salcisson,
 I rosbifi, coi zigot,
 I rosbinghi, coi rolot,
 Sia pur semplici, o farsì;
 Xè bandidi anca i salmì
 Xè bandidi anca i colli.

No i me staga a nominar
 Andoliè, anetrè, alafar.
 Cossa far dei salpurè,
 Dei cogliuf, e dei purè,
 Dei refredi, e dei brulè
 Dei aioscè, dei antremè?
 Mi noi voggio per i piè.
 Maledeti quei gonfiet,
 Quei subranc, quei cotolet;
 Maledeti quei godiù
 No li voggio sentir più.
 Che i li fazza via de quà
 Ma da mi no ghen sarà.
 Mi vò magnò altro, che Osei,
 Ma i xè quei,
 Coi i ghe piase..., Cossa oi dito?
 Co i ghe piase! Che dimande!...
 Eco quà, che i porta in tola;
 Le se comodi, Signori,
 Le se senta tuti quanti;
 Via Comare feve avanti,
 Là vicina al Sior Zaneto.

Ella po, Siora Mariana,
 Mela voggio sempre arente...
 Oh la toga.... gnente, gnente,
 No ghe bado, la li magna:
 La li magna, che i xè boni;
 I xè quarti de Frisoni,
 Ben conzadi,
 Cusinadi
 In paela
 Co garofolo, e canela,
 E co questi i gà conzà
 Un bocon de pan tagià.

Questa xè la mia menestra:
 Ne ghè risi, no ghè bisi;
 No ghè vena, no ghè lente,
 No ghè sope, nè polente,
 Nè 'l panizzo, nè l'erbete,
 Nè rafioi, nè lasagnete
 Cao-de-fiori, macaroni.
 Cussì boni.

Traria zo per le finestre
 Ste menestre

Negre, rosse, latesine,
 Zale, verdi, e che soi mi,
 Che ale tole più stimade
 Vien portade,
 Vien magnade
 Senza gnanca dimandar
 Cossa diavolo le sia;
 E chi sa, che porcaria,
 Che potachi, che le xè.
 Se savessi quante volte,
 Che gò visto certi cuoghi
 A burlar i so paroni
 Dei boconi, che i ha magnà....
 Qua da mi no l'è cussi,
 Magnè pur co libertà....
 Oh i xè quà cola fritura....
 Ma le senta mo un pocheto,
 Che gran testa che gò mi:
 No gò miga testa dura,
 Mi me piase ben magnar:
 Za le lo crede,
 E po le vede

Me son quasi destrigà
 Tuta quella arcimenestra,
 Che quà a tola i gà portâ.
 Onde tornando a bomba
 (Dirave i Fiorentini)
 Mi che voria magnar ogni momento
 Me son pensà de tior medicamento.
 Ma la xè una medicina,
 Che xè mia particular,
 Che la serve a maravegia
 Per farmè vegnir voglia de magnar.
 Se le andasse per Venezia
 Nela megio speciaria
 No la trova medicina
 Più operosa de la mia....
 Vedeù là quella fritura?
 Queli xè tuti montani
 Oseleti freschi, e sani,
 Che gà un certo saporeto
 Amareto,
 Che li fa medicinali,
 E mi i me fa guarir da tuti i mali.

Ma ghe vol po la so dosa,
 Ghe vol torli in que' tal modo,
 E secondo i varj mali
 I va coti in butiro, o pur in brodo.

Per el mal d' inapetenza
 I va coti in sta maniera,
 Ma perchè i fazza efeto
 No saria gnente una dozena intiera.
 Ghen vol almanco dò:

Sì: vintiquatro Osei,
 Co no i xè più, che bei.
 Ogni poco de panza,
 Che gabia quello, che li vol magnar
 Par medicina i stentarà a operar.

Mi lo provo
 Co me trovo

Co una panza cussì piena,
 Che dal peso per portarla
 La me fà doler la schena.
 La me toca za sta cossa,
 La me toca molto spesso:

Vardè adesso,

Che saria certi minchioni
 Che gà in testa dele rane,
 Che no magnaria gnanca do boconi:
 Ma mi gnente: giusto alora
 Che ghen magno assae de più,
 Parchè i fazza megio efeto.
 S'ha da dar mo per dispeto,
 Che a magnarghene ogni zorno
 Gò el mio stomego avezzà.
 Za le sà

Se se avezza anca al velen;
 Ònde, amici, capi ben,
 Che convien
 Co ste cose
 Ogni dì crescer la dose...

Eco el lessò; mi non uso
 De far far certi antipasti:
 Mi me basta de magnar
 Diese piati par disnar...

Comareta benedeta
 No ve piase i tordi lessi?
 Anca mi son come vu,

Cō ghen magno vinti trenta.

No ghen posso magnar più....

Cossa gala, cossa è stà,

Cosa è sta Siora Mariana?...

Ghè andà un osso in tela gola!

Gnente, gnente.

El rimedio xè quà lesto:

Presto presto

Sto bel tordo in tun bocon;

La lo ingiota tuto intiero.

La guarisce sì da vero:

La lo ingiota.... No la è bona?

Oh! per Baco se pol dar?

L'a 'l gargato molto stretto

Mi lo magno anca par spasso.

No? la varda.... ecolo a basso

Ah! via via

La xè guaria

La se toga dele quagie,

Che gà i ossi

Manco grossi....

Cussì poche vita mia?

Cossa xèle vinti quagie?

Le xè giusto un pan da un bezzo,

Anzi no, che un panetin,

Benchè el sia più picinin

Mi el me sazia assae de più.

E po gnente; za la vede

Se ghen magno un boconcin,

Che de più no magnaria,

El xè giusto per far forestaria....

Vien le lodole,

Vien le lodole,

Sì, care, sì,

Si quà da mi.

Oh! che bone!

Benedete,

Che stupende, che squisite,

Che gustose, e saporite,

Che le xè cussì caldete!

Presto, presto tolevene zo,

Che mi son tuto atento per mi.

Ah! perchè no goi la boca

Granda come una finestra;

Che piaser che gavarìa!
 Da una parte metaria
 Un gran piato de menestra,
 Da quel altra el frito, el lessò;
 E 'l restante impeniria
 De sto rosto cussì bon,
 E faria tuto un bocon.

Ma perchè mo la Natura

No ala visto i me bisognì?

Che ghe fosse almanco caso

Per le rechie, per el naso,

Per i ochi, e che soi mi.

Ma cussì;

Co na boca cussì sola,

Co un buseto in te la gola

Come mai me sfogarò,

Come mai me saziarò?

Mi no so.

Co sta roba mi no posso....

Deme quà quella polenta,

Che la prova, che la senta...

Ma digo mi: xèla po stada

Tela licarda ben cusinada? ...
 Sì? Va ben: donca dè quà,
 Che ghen magna a crepapanza.
 Bona, bona: la me piase.
 Ma perdiana cossa feù;
 Quanta mai me ne portè? ...
 Ah! convien, che me giustifica;
 Sì Natura femo pase,
 Xè dover, che me contenta
 De sta boca, che ti ha fato,
 Che la è bona per polenta....
 No voi altro, no voi altro;
 Portè tuto via de quà,
 Che ho magnà, che ho magnà....
 Ma cossa, che xè là?
 Oh! che diavolo, Oseleti!
 Xèli rosti? Ah benedeti!
 Voi cercar sti petirossi;
 Ma sarave un farghe torto
 Lassar là quei codarossi.
 Oh! cospeto che fincheto;
 Che caonegro, che ortolan!....

Voi magnarme quel montan,
Anca staltro... anca sti do;?...

Ah! sti quattro; e lasso là....

Malideti sti montani

No comincieli a operar!

Anca rosti i fa sto efeto?...

Si per dia me xè tornada

La mia voglia de magnar.

Ah! maghemoli

Destrighemoli.

Quà sti finchi, quà sti finchi,

Sti frisoni,

Quà anca st'altri, che i xè boni.

Oh! che otima miscianza,

Che i farà in tela mia panza.

Ah! magari ghe ne fosse

Da poder sin che gò fia,

Sin che un'angolo me avanza

Impenirme ben la panza.

Che i sia pur cerant, perussole,

Che i sia pur subioti, o passere,

Che i sia pur quello, che i vol:

Mi me basta che i sia Osei.
 Ma per dia no xè possibile:
 No val bezzi, no val trapole
 Per averghene, per chiaparghene
 Quanti mi voria magnarghene....
 A sta ora per comprarghene
 Gavarò speso un milion:
 Gavarò impenò de trapole
 Quasi cento possession,
 Perchè mi gò réde trate,
 Gò dei rocoli a bicefe,
 Gò tordere, quagiarie,
 Gò passade, ciese, utie,
 Gò el diluvio, gò paloni,
 Gavarò mile Falconi,
 Altretanti Cazzadori
 Altretanti Oseladori;
 E po dopo ghe son mi
 Che son bravo più de lori....
 Si dasseno, senza scherzi,
 Che mi passo qualche ora
 A quel rocolo là fora....

Mi fra tante altre Oselade
 Me son scielto questa quà,
 Perchè posso star sentà,
 E ghen chiapo infinitissimi
 De sti cocoli carissimi.
 Ma non son po miga mi
 Che ghe buto la cestela;
 El xè l'omo, che stà là.
 Una volta gò provà,
 E me son portà benissimo,
 Ma ò scoperto, che ò un difeto.
 Quando vedo un Oseleto,
 Che xè quasi par chiaparse,
 Mi me par d'averlo in boca,
 E sentì quel, che me toca:
 Son cussì fora de mi
 Che no so cossa, che fazzo,
 Che no so quel che me digo,
 Onde invece del cestelo
 Trago un cigo-mandandoghe un baso;
 L'Oseleto sela moca
 E mi resto con tanto de naso...

Ma co stè minchionarie
 Me scordava un bon bocon .
 Oè porteme quel fiascon
 De Friularo del Stradon ,
 Che quà tuti avemo in mente .
 Che quel Vin cussì ecelente
 Col so ardor arcigrandissimo
 Dele Muse arciamicissimo
 El farà che no sia priva
 Sta nostra tola del so bravo evivà .
 Oh ! 'l xè qua sto moroseto .
 No avè invidia cocoleti ,
 Che ghen bevo do sorseti ,
 E po torno da vualtri ,
 Benedeti de Oseleti .
 Ma via friularo
 Da bravo ajuteme
 A far sto prindese ,
 Da bravo caro
 No ti vol? lo farò mi .
 Viva donca sta nostra compagnia ,
 Ma viva anca la razza dei Oseleti

La sanità nostra compagna sia
 Ma, che i Osei sempre sia cussì perfeti,
 Primavera per nu sempre voria
 Ma sempre Otuno per sti Cotoleti.
 Nù vorave, che fossimo eternissimi,
 Ma che Lori po fosse infinitissimi,

Benedeto sto bon Vin

Che fa star zoso el magnar,
 Che fa alegro el coresin:
 Mi lo voi sempre lodar,
 Fin che el vien in gotesin:
 Ma co andemo sui do goti
 El scomenza andar in sù,
 Nè lo posso lodar più.
 Maledeti sti imbrìagoni
 Sri porconi,
 Che gà sempre el goto in man
 No li posso tolerar:
 No se pol gnanca parlar,
 Che no i dise altro, che vin;
 Sia pur pezo dell' Aseo,
 Che per lori tuto è bon,

Perchè i ha perso la rason,
 E po dopo sti imbriagoni,
 Sti porconi,
 Sti mastei da soto-spina,
 Ste barile, che camina,
 Se ghe dassi un Oseleto,
 I ghe magna mezzo el peto,
 E po i dise: oh! gò magnà.
 Eh! che i vada.... Ma no serve
 No me voggio altro inquietar.
 Deme quà quel matrimonio....
 Quel pastizzo: maledeti,
 No savè che la polenta
 La xè sposa dei Oseleti?
 Mi me par, che vel' ò dito,
 Che nol xè vero d'isnar
 Se no ghè la so polenta,
 Quando Osei s'hà da magnar.
 Ma polenta schieta.... oh! giusto,
 No ghe trovo nessun gusto....
 Questa è fata col butiro:
 La gà dentro mille sorte.

De Oseleti saporiti,
 Parte rosti, e parte fritti,
 Che 'l mio cogo a lento fogo
 Gà lassà, che i se consuma
 Tra le tartufole le più pregiade;
 E tra i garofoli, e le noscade.

Oh! de questo mo ghen magno
 Per saziarme un pochetin;

Anca vu, cara Comare,
 Anca Ela, sior Tonin...

Mi no so po cossa dir;

Quando che no le pol più

No le voggio altro sforzar:

Mi so che ho una gran vogia de magnar....

Oh! bela si dasseno!

Ve fè le maravegie?

Questo vol dir, che poco,

Sui libri avè stracà le vostre cegie.

Mi mi ve dirò, mi

La so vera rason:

Diseme aveu mai leto el Sior Platon?

Vedeù; lu dise: che gavemo tuti

Al nascer nostro na costelazion,
 Anzi una stela, e questa fa che astuti
 Alcuni sia, che un altro sia un minchion;
 Che a chi ghe piasa i vovi, a chi i persuti;
 A chi piasa sentir crier: oà;
 A chi sentir sonar tarapatà.

Quelo vorave andar sempre a cavallo
 Questo sempre in carrozza, e staltro a piè.
 A chi ghe piase molto el color zalo,
 A chi ghe piase el bianco, a chi el tanè;
 Chi vol brodo de vipera, o de galo;
 Chi sorbeti, chi ponchi, e chi caffè:
 E questo per l'influsso ne succede,
 Che gà le stele, che su nu presiede.

Oltre de questo el dise, che le fa
 Più stele unite insieme una figura.
 Altre d'un Can la forma le ne dà,
 Altre d'un Porco, o pur d'una Creatura,
 Altre un gran Asenon come che vâ,
 Altre un Beco o una Cavra le figura;
 Altre un Cavallo, una Formiga un' Anza,
 Altre una bela Puta, altre una Manza.

Cussì se da, che sempre nu se tremo
 Un animal, o l'altro a somegiar,
 E con quel nome spesso nu chiamemo
 Tuti quei, che se vol rimproverar;
 Ma lasseme che diga: no dovemo
 Dir gnente nu su sto particolar,
 Parchè, cossa ghen pol Sempronio o Tizio
 Se'l porta in lu dela so bestia el vizio?

Bisogna anca saver che tuti nù
 Soto una sola stela semo nati,
 E che za ghene vol molte de più
 Per formar sti animai come i va fati;
 Per questo molti, e molti se tol sù
 D' Arpie, de Porchi i titoli onorati,
 Quantunque tra le stele no ghe sia
 Altro che un solo Porco, e che una Arpia.

Ma per tornar a quel che ve diseva,
 Sapiè, che in mezzo a tuti sti animai
 Ghe xè anca el Lovo: infati el ghe voleva:
 Ghe xè anca Osei, se no i ghe fosse guai!
 E mi nato sarò co se vedeva
 I Oseleti col Lovo a star tacai,

E la voglia, che al Lovo ghe sarà
 Venudo alora el m'ha comunicà...

Ma quà cossa se fà

Cussì senza magnar?

Me par, che ghè del'altro da portar?

Ah! el xè quà l'atingoleto

Tuto quanto becafighi:

Ah! el gran otimo oseleto!....

Oh! le magna po, che questo

El xè fato quà per ele....

No le vo'? Proprio mi resto

Che le gabia cussì presto

Impegno le so buele.

Ma pacienza.... za sta roba

No andarà butada via,

Che ghe xè po finalmente

El rimedio in boca mia.

E vu altri Servitori,

Fin che magno i becafighi

Portè un piato anca per Lori....

Ma vedo, che nessun

Gà voglia de magnar.

Se i porta un altro piato
 Melo magno mi solo,
 E i altri sta a vardar;
 Onde no voi sta cossa,
 Voi che magnèmo tuti:
 Donca porteme i fruti.

Ah! benedeti

No ghè fruti più perfeti,
 Più stupendi, più squisiti,
 Più gustosi e saporiti.

Sento a dir del' Ananà

Che el xè un fruto arcistupendo;
 (De sto fruto no m'intendo,
 Nè ghe n'ho gnanca magnà)
 Ma i me dise, che consiste
 Sta stupenda rarità,
 Perchè in lù sto fruto unisce
 Varj gusti, ch'altri gà.....
 Ben... i mi no ghe n'ha varj,
 Noi gà quei dei fruti soli,
 Ma quei tuti, che provar
 Pol chi hà voglia de magnar.

Sì Signori, i ghe xè tuti.

Via, ve digo, portè i fruti....

Oh! le diga, oi minchionà?

Le ghen magna, che i xè tuti

Picolini,

Frescolini

Tondolini

I xè tuti Lughèrini....

Quattro soli! Oh cospeton!

Me faressi andar in colera....

Se sti trenta no magnè,

Recordeve mi v'aviso,

No ve vardo più in tel viso....

Anca vu via Comareta

Tolè za trenta, quaranta.

Anca Ela, Siora Aneta,

Za per mi ghe ne xè ancora,

Quà de fora.

Questo è un piato predileto,

Onde al Cogo gò ordinà,

Che el ghen meta dopo questi

Per mi solo una speada

Più del dopio de quei là....
 Ma no xèlo un gran piaser
 A magnar de sti cosseti?
 Mi me par giusto d'aver
 Un scartozzo de confeti....
 Cossa è sta? Chi xè venudo?...
 Ūna Lettera? Dè quà....
 Oh! cospeto!.... Le perdona....
 A un disnar son invidà....
 Mi convien, che vada subito;
 Me despiase assarle quà.
 Ma le vede la ocasion
 Per ancùò porta cussi....,
 El xè un pranzo, che i lo fa
 Nel casin de mio Nevodo;
 El me scrive che abondanza
 De Oseleti ghe sarà....
 Ah! no posso ricusarli,
 L'è un sconzuro trope forte,
 Perchè a mi i me piase massa:
 Le permeta, che le lassa
 Perchè presto i porta in tola....

Ma no son miga un balordo,
 Me ricordo, me ricordo....
 O: porteme presto, presto
 Anca el resto:
 Sì, anca staltri Lugherini....
 No i xè coti? Oh! pofardia,
 Che sfortuna xè la mia!...
 Ben, sentì: da quà do ore
 Speraria d'aver disnà
 Tornerò subito quà....
 Se no i trovo coti in punto,
 Se i xè freddi, o brustolai
 Ve farò pagar la pena
 Ben de tuti sti pecai....
 Ma mi vado, che za so
 Che sta cara compagnia
 La xè tanto, e tanto bona,
 Che la perdona
 Se la lasso cussì sola....
 Vado a tola, vado a tola.

E L F I N.

Il suo prezzo è di Soldi venti.

*Nota delli Poemetti Apiciani
usciti sino ad ora.*

- M**accheroni, Poemetto Giocoso, di Jacopo Vittorelli, con un' Inno cantabile sul medesimo argomento, del Sig. De' Rogatis. L. 1:15
- Polenta, Scherzo Ditirambo in versi Veneziani, dell' Autor del Friularo. L. 1:15
- Vin Friularo de Bagnoli, Ditirambo, ancor questo in versi Veneziani, con in fine un piccolo Vocabolario dei Zerghi pur Veneziani più scuri. L. 1:
- Caffè, Poemetto in due Canti, di Lorenzo Barotti. L. 1:5
- Fragole, Poemetto in due Canti, del Co: Abate Roberti. L. 1:10
- Salameide, Poemetto Giocoso in quattro Canti, con Note, del Dottor Antonio Frizzi. L. 3:
- Bacco in Toscana, Ditirambo di Francesco Redi Accademico della Crusca. L. 1:10

Zucca, Ditirambo in dialetto Veneziano ,
del Co: M. A. C. L. :15

Ciocolata, Elegia, traduzione dal latino ,
prima Ediz. con il testo latino in fine. L. :15

Oseleti, Capriccio Ditirambico , in dialetto
Veneziano. L. 1:

